

11429

浮山集

三

卷一

山

一

一

詳校官庶吉士臣柳邁祖

主事臣呂雲棟覆勘

謄錄貢生臣劉錫珪

謄錄監生臣黃綸

欽定四庫全書

浮山集卷五

宋仲并撰

表

天申節賀表

千秋上唐宗之鑑誕節載臨萬年稱漢殿之觴忱誠並
奏歡均率土望極層霄恭惟皇帝陛下剛健法天聰明
冠古祖功宗德益增九廟之輝主聖臣賢相會一堂之
上鴻雁昔勤於還定鳬鷺今享於盈成無疆惟休有秩

斯祐臣祇膺恩綽叨奉守符聞道路之歡呼望闕庭而
頌祝卜年卜世遠踰周歷之期爲春爲秋俯陋莊椿之
算

賀皇太后還闕表

王化復行永輯重熙之緒天休允答聳觀長樂之還盛
事無前歡聲相告恭惟皇太后徽音是嗣懿德惟行早
開甲觀之祥基圖有永歸就東朝之養壽考無疆恭惟
皇帝陛下誠懋格天孝深愛日垂裳而治終承戲綵之

娛當饋永懷無俟含羹之獻方業業兢兢乎再造茲融
融洩洩之重歡聖德何加令聞不已臣叨榮滋久竊忝
爲深班列辟以稱觴阻趨漢殿均黎民而擊壤增想堯
天宗社之休乾坤何極

蘄州到任謝表

天陞深嚴已誤對揚之寵准邦安便更叨臨遣之華懼
不克勝凜無所措臣某中謝伏念臣材惟駑鈍分合羈
栖平生憂患之因仍晚歲塵埃之汨沒少習徒在固自

鄙其雕蟲壯志無成或共憐於畫虎雖世路三戰之皆
北而此心萬折之必東巢林不過一枝姑安素分伏櫪
志在千里未泯壯圖頃備數於有司獲盡言於當宁粗
陳時弊偶契宸衷華袞蒙一字之褒臬囊罄千慮之得
罪實多於擢髮豈易湔除疵不待於吹毛曲蒙涵貸起
於祠館付以邊城于淮之濱素稱樂土溯江而上不隔
幾程荷恩實深指心圖報已涉近境即布上恩問所疾
苦如何且今閭里安否有欲糾合鄉社以備他盜者臣

則分之飲食諭以協心有能服勤耒耜以務農功者臣
則犒之酒漿勉其戮力告以天子既仁且聖於生靈務
在於憐信哉斯民至愚而神聞臣言莫不鼓舞每事不
擾無令橫吏及其門有冤即言無使豪宗肆其暴要令
五縣常若一家使臣得竭其愚撫躬自知其幸此蓋伏
遇皇帝陛下仁如天地英紹祖宗一視四海之黎民寧
分於遠邇思得兩漢之循吏或求之賤微顧如愚臣上
辜聖世心非木石豈不知投拭之深恩若邱山唯自誓

廉捐以報儻有一毫之補寧甘百謫其身感極涕零慙
深汗浹使愚使過實僥倖而得之于蕃于宣期黽勉以
稱此庶幾贖過無重逮幸然臣視彼田疇稽之圖牒戶
以口計昔爲十有二萬今主客之數不過二萬是猶十
分之一田以頃計昔亦十有二萬今耕鑿之數僅踰三
千是爲百分之三市井之間居民未復郊野之外人跡
猶稀臣謹招集流離俾還故業銷除愁嘆俾樂聖時唯
節用可以豐財臣當鑄俸廩之大過唯清心可以省事

臣當戒宴飲之不時吹簫未及噬臍既往事有利於民而便於俗臣當夕以思而朝以行去國雖遙敬想天威之咫尺其治貴簡悉遵聖訓之丁寧誦堯之言服膺無斁

代謝郊祀加食邑三百戶表

歲禮對天曾豆邊之莫預疏恩加地尚簪履之弗遺詎獲懇辭肆聞成命中謝伏念臣壯心彫落多病侵陵歸故國之邱園稍休暮景奉真祠之香火仰酬大恩屬三

歲之親祠蒐多儀之久廢天地昭格祖宗宴娛望極園
丘想靈旂之來下恩沾衡宇仰睿澤之旁流久矣投閒
恍焉拜命雖附劇於鰲抃初莫效於駿奔方業茂少康
不失配天之舊顧功慙仲叔猥蒙與邑之多固避無從
祇承有覲此蓋伏遇皇帝陛下受天全付躋世大安孝
允格於神明誠克參於高厚卜年卜世符三代有道之
長饗帝饗親嘉四海以職來祭迎景貺於至日敷龐禧
於普天誕錫綸音增加井賦既欣逢於盛世又竊冒於

殊恩歌詩十九章莫述無前之蹟邑人三百戶終懷非
據之憂溝壑未填涓埃是效

代謝郊祀加恩表

薦奏上儀肅將宗祀猥被便蕃之寵曾微顯相之勞竊
以一精二純間三歲圜丘之祀九階五室參四阿重屋
之規斷于淵衷昭我烈考鬱精禋之交格紛戩穀之具
來顧何力焉有如臣者乃躡登於侯社仍增多於井田
此蓋伏遇皇帝陛下游舜巖廊美禹黻冕宅中圖大方

以四海爲家嚴父配天茂對三靈之貺舉國舊典加恩
具臣微效豆籩以均敷於神社遠思籌策當益贊於聖
謨

代辭免郊祀加恩表

均錫神釐誕揚制綽雖頒恩率土無遠弗霑而拜命自
天非宜爲懼伏念臣猥由凡瑣進冒寵榮曾何效於絲
毫徒自嗟於駕蹇海寓際千齡之運郊丘親三歲之祠
而臣竊食殊庭養疴近郡於穆清廟阻陪多士於駿奔

爰熙紫壇徒想千童之羅舞敦陪邑采眩曜衡茅等三
事大夫以疏榮豈四姓小侯之敢望殆措躬之無所顧
何力之有焉非不貪榮念無以稱伏望加憐誠悃亟寢
誤恩如微臣得邑已多況平時於國何補貳公峻秩久
懷負且乘之羞萬戶錫封當重器與名之假

代謝給事中表

代言罔功已玷綸闈之選疏恩踰分更叨瑣闥之除人
曰次遷臣慙虛授中謝竊以侍從之貴特異常僚封駁

之司與聞有政伏自比年而降率由西掖而升亦惟爾
位靖共不犯擅權之誚庶幾乃心啟沃無慙批敕之風
伏念臣夙誤聖知洊塵華貫擢從載筆俾與贊書思若
湧泉莫想前聞之彷彿信如皦日願裨聖治之毫分念
衆賢和則萬物和方朝廷正而百官正典司獻納務協
寅恭災遽來於滿盈疾未瘳於瞑眩酬恩無地榮但懷
於晝歸錫命自天寵更叨於夕拜若爲仰稱彌懼疾顛
此蓋伏遇皇帝陛下孝格神明誠通高厚眷近侍清華

之地矜一介遲暮之蹤聖德無加已成洩洩融融之樂
臣力何有莫追灝灝噩噩之書方右省之冒居惟左遷
之乃稱矧疲曳阻趨于文石尚褒陞進列於黃扉避極
循牆懼乏回天之力感深銘骨彌傾就日之心臣敢不
尚厲壯圖仰銜洪造既曰有事於殿內豈容無益於縣
官久矣負薪滋殊恩之未替期於結草誓初志於弗移

代鎮江守臣到任謝表

帶漢沔之雙流初辭重鎮環江山之四面復玷名藩自